



## Kolaborasi UMP dan MBM lahirkan generasi belia berpengetahuan

Universiti Malaysia Pahang (UMP) menjalinkan kerjasama strategik dengan Majlis Belia Malaysia (MBM) dalam menambah nilai untuk melahirkan generasi belia berwibawa yang lebih berdaya saing.

Majlis menandatangani memorandum persefahaman (MoU) disempurnakan Naib Canselor Universiti Malaysia Pahang (UMP), Profesor Dato' Dr. Daing Nasir Ibrahim dan Presiden Persatuan Wanita UMP (Matahari), Profesor Madya Dr. Mimi Sakinah Abdul Munaim mewakili UMP. Manakala, pihak MBM diwakili Presidennya, Mohamed Maliki Mohd. Rapiee dan EXCO MBM Ahmad Daniar Ismail.

Menurut Dato' Daing, inisiatif yang digerakkan ini akan melibatkan program Pembangunan Belia Melalui Latihan, Kepimpinan dan Keusahawanan, Serantau dan Antarabangsa serta Penyelidikan, Pembangunan dan Reka Cipta," kata beliau semasa menyampaikan ucapan sempena Majlis Menandatangani MoU di

Dewan Bankuet UMP Gambang pada 28 Februari 2012 yang lalu.

Kata beliau lagi, masyarakat terutamanya sekitar Pekan terutamanya berdekatan kampus UMP bakal menerima manfaat daripada kerjasama ini.

Dato' Daing berkata, UMP amat berbesar hati untuk menerima MBM sebagai rakan kongsi dalam konteks kerjasama ini berdasarkan reputasi dan pengiktirafan yang dimiliki oleh organisasi terbesar yang mewakili golongan belia di negara ini. Katanya, hasil kerjasama ini akan melibatkan komitmen sebuah badan NGO, Persatuan Matahari dan Pusat Pengajian Berterusan & Pembangunan Profesional (CENFED) dalam menjayakan program usaha sama dengan MBM ini.

Sementara itu, menurut Mohamed Maliki, kerjasama keduanya ini akan melibatkan pembangunan belia terutamanya di Kuala Pahang.

MBM akan mengenal pasti golongan belia yang boleh diketengahkan dan UMP sebagai universiti yang memiliki

kepakaran teknikal akan membantu dalam menyediakan jurulatih dan tenaga pengajar.

Beliau berkata, pihak Kerajaan telah memperuntukkan RM200 juta dalam pembangunan belia dengan memfokuskan tiga bidang utama iaitu kepimpinan, kemahiran dan keusahawanan.

Justeru, banyak program yang boleh dijalankan untuk dimanfaatkan bersama masyarakat dan kelompok belia yang didefinisikan berumur di antara 18 hingga 40 tahun.

Hadir sama dalam majlis MoU, Penolong Naib Canselor (Hal Ehwal Pelajar & Alumni), Profesor Dr. Yuserrie Zainuddin, Pendaftar, Haji Mustafa Ibrahim, Bendahari Zainuddin Othman, Ketua Pustakawan Haji Ruslan Che Pee dan Pemangku Pengarah CENFED, Haji Jamil Basri.

Bersempena dengan itu juga diadakan Majlis Dialog Bersama MBM bertemakan "Pemeriksaan Belia dan Kesukarelawan Pemangkin Jaringan Kerjasama". Ahli panel terdiri daripada Presiden MBM dan Tokoh Belia Negara 2011 iaitu Mohd. Rizan Hassan serta pensyarah Fakulti Teknologi, Mohamad Rozi Hassan sebagai moderator.

Dialog berjaya mendapat sambutan mahasiswa apabila lebih 400 orang hadir untuk berkongsi pengalaman dan memahami semangat kesukarelawan selain berpeluang menceburkan diri dalam aktiviti belia di Malaysia dan di peringkat antarabangsa.